

Naqqiut

Siusinnerusukkut 6. august 2021-mi nassiunneqarsimasumut taartaasoq.
(*Naalakkersuisup taaguutaa allanngortinneqarpoq naalakkersuisoqarfiit allanngortinneqarnerisa kingunerisaanik*)

Namminersorlutik Oqartussat akuersissuteqarnissaat pillugit Inatsisartut aalajangiiffigisassaattut siunnersuutit:

Imm. 124:

Ingerlatsiviit pillugit inatsisip allanngortinneqarnera pillugu inatsisini assigiinngitsuni aalajangersakkat ilaasa kunngip peqqussutaatigut Kalaallit Nunaannut atuutsilernissaannik Namminersorlutik Oqartussat akuersissuteqarnissaat pillugu Inatsisartut aalajangiiffigisassaattut siunnersuut. (Piginnittuiit pillugit malittarisassianik piviusunngortitsineq aamma aalajangersakkanik attuumassutilinnik nutarsaaneq)

Imm. 125:

Inuussutissarsiutigalugu aningaasaateqarfiit pillugit allannguutitut inatsisini assigiinngitsuni aalajangersakkat ilaasa kunngip peqqussutaatigut Kalaallit Nunaannut atuutsilernissaannik Namminersorlutik Oqartussat akuersissuteqarnissaat pillugu Inatsisartut aalajangiiffigisassaattut siunnersuut. (Piginnittuiit pillugit malittarisassiat piviusunngortinneri)

Imm. 126:

Sulliviit inuussutissarsiutitut ingerlatat ilaat pillugit inatsisip allanngortinneqarneranut inatsisini assigiinngitsuni aalajangersakkat ilaat kunngip peqqussutaatigut Kalaallit Nunaannut atuutsilernissaat pillugu inatsit pillugu Namminersorlutik Oqartussat akuersissuteqarnissaat pillugu Inatsisartut aalajangiiffigisassaattut siunnersuut. (Piginnittuiit pillugit malittarisassiat piviusunngortinneri)

Imm. 127:

Aningaasaateqarfiit aamma peqatigiiffiit ilaat pillugit inatsisip allanngortinneqarnissaanut inatsisit assigiinngitsut kunngip peqqussutaatigut Kalaallit Nunaannut atuutsilersinneqarnissaat pillugu Namminersorlutik Oqartussat akuersissuteqarnissaat pillugu Inatsisartut aalajangiiffigisassaattut siunnersuut. (Piginnittuiit pillugit malittarisassiat piviusunngortinneri)

(Inuussutissarsiornermut Niuernermullu Naalakkersuisoq)

Saqqummiussinermit allakkiaq

(Inuussutissarsiornermit Niuernermullu Naalakkersuisoq)

Siullermeenera

Naalakkersuisut sinnerlugit matumuuna ingerlatsivinnut inatsisip allanngortinnissaa pillugu inatsisit, inuussutissarsiutigalugu aningaasaateqarfiit pillugit inatsisip allannguutit pillugit inatsisit, sulliviit inuussutissarsiutit ingerlatat ilaat pillugit inatsisip allanngortinneqarneranut inatsisit aamma aningaasaateqarfiit aamma peqatigiiffiit ilaat pillugit inatsisit pillugit Kalaallit Nunaannut atuutsitsilerneq pillugu peqqussutinik Namminersorlutik Oqartussat akuersissuteqarnissaat pillugu Inatsisartut aalajangiiffigisassaattut siunnersuut saqqummiutissavara.

Ukiuni kingullerni akileraartarnermut oqartussaasoqarfiit akornanni paasissutissanik paarlaasseqatigiittarneq, aamma pinerlunnikkut pissarsianik malunnarunnaarsaanerup, imaluunniit qunusiarinnikkut anguniagaqarnermut aningaasanik aqqissuussiffiup atorneqarnissaanik pinaveersaarineq pillugu nunanik tamalaanik suleqateqarnerup nukittorsarnissaa sammisarineqarsimavoq. Suleqatigiinnermi tassani FATF aamma OECD aqqutigalugit Kalaallit Nunaat peqataavoq.

Pinerlunnikkut pissarsianik malunnarunnaarsaanerup aamma akileraarutinik akiliinnginniartarnerup akiornissaat pillugu Global Forumimi suleqatigiinnikkut FATF-ip aamma OECD-p nassatarisitaasut pisussaaffigisanik Kalaallit Nunaat malittarinnilersinnaatillugu, piginnittuiit pillugit malittarisassiat atuutsilernissaat pillugit inatsisip katersanik aalajangiiffigisassatut siunnersuutikkut Inatsisartut matumuuna akuersissuteqarsinnaapput.

UKA 2019-imi Kalaallit Nunaannut piginnittuiit pillugit malittarisassiat atuutsilertinnissaat siunertaralugu Danmarkimi naalagaaffimmut Naalakkersuisut attaveqaqqunissaat pillugu aalajangiiffigisassatut siunnersuut Inatsisartut akuersissutigaat.

Aalajangiiffigisassatut siunnersuutip maannakkut oqaluuserisatta saniatigut inatsisip katersaniipput aktiaatillit kinaassusersinissaat, paasissutissat ingerlateqqinneri, aamma aktiaatillit piginnaatitaaffimminnik suliaqarnerisa oqilisaaffiginissaat pillugit Kalaallit Nunaannut inatsisissatut siunnersuutit. Taamaattumik ataatsimmiinnermi matumani inatsisissatut siunnersuutip Folketingimut saqqummiunna sioqqullugu tamatumunnga oqaaseqaateqarnissamut siunnersuut saqqummiunneqarpoq.

Peqqussutit piginnittuinnik nalunaarsuisarnerit pillugit malittarisassianik atuutsitsilerput, pinerlunnikkullu pissarsianik malunnarunnaarsaanerup, imaluunniit qunusiarinnikkut anguniagaqarnermut aningaasanik aqqissuussiffiup atorneqarnissaanik iliuuserisat pinaveersaartinnissaat siunertaralugit tamanik takunnissinnaanerup annertusisinnissaa taakku siunertaraat.

Aammattaaq ingerlatseqatigiiffiit aningaasaataannut, aallartitsisartutut ingerlatseqatigiiffinnut, aningaasaatinik piginnittut taarsigassarsisarnerinik, akissarsisitsisarnermut politikkimut, qanigisatut illua'tungerisat peqatigalugit niuernernik takunnissinnaassusermut aamma akuersisarnermut, kukkunersuisartunik toqqaasarnermut aamma soraarsitsisarnermut, A/S-inngortillugit suliffeqarfiit killilimmik akisussaaffillit (V.M.B.A.-t) allanngortinnerinut, inunntut paasissutissanik illersuinermit, piginnittuinnut aamma nakkutilliisarnermut katersanut tunngasunik malittarisassiat nutarsarneri ingerlatsivinnut inatsisip allanngortinnissaa pillugu peqqussummi ilaapput.

IVS-imik pilersitsisinnaaneq atorunnaarpoq, anpartsselskabinulli aningaasaateqarnissamut piunasaqaataasoq 50.000 kr.-nit 40.000 kr.-nut appartinneqarpoq.

Taamatut oqaaseqarnikkut aalajangiiffigisassatut siunnersuutit Inatsisartut akuersaarlutik oqaluuserinninnissaannut ingerlateqqippakka.